



Sol significator mortis solus, saluus ab infortunis, significat quòd natus morietur ex acuta infirmitate & nimia caliditate, eritq; mors eius inter socios & amicos. Si aut fuerit infortunatus, morietur mandato domini, uel ratione patris, uel consanguinei sui, aut subito à dolore cordis uel stomachi in magna societate hominum, uel oppressione in loco uili, uel in loco tristitiæ exhalabit animam.

Venus significatrix mortis sola, & ab infortunis libera, significat quòd natus morietur ex dolore uentris, uel ex commestione ficuum, dactylorum. Si uero fuerit damnata, morietur natus ex nimio coitu, uel mortali medicamine, uel morietur morbo stomachi, uel cordis, uel epatis, uel egestionem sanguinis, siue apostematibus, uel fistulis, aut malis potionibus, aut infirmitatibus uenientibus ex nimia humiditate.

Mercurius solus significator mortis bene dispositus, significat mortem ex infirmitate capitis, uel ex infirmitatibus animæ sensus communis, sicut cogitativæ, fantastiæ, & his similibus, uel ex dolore cito interficiente, uel ex dolore intestinorum, uel ex icteritia, uel ex doloribus occultis & diuersis, quorum causa non cognoscitur. Si uero fuerit infortunatus, morietur causa ratiocinationis, uel ratione scripturæ uel consilij, uel melancholia, uel mania, uel epilepsia, uel tussi, uel sputo superabundante.

Luna sola dispositrix mortis, libera, significat quòd morietur ex infirmitatibus, quæ proueniunt ex assumptione ciborum humidorum, uel ex multo potu, uel ex superfluo coitu. Si uero fuerit infortunata, morietur natus secundum naturam ipsam infortunantis.

Planeta gubernator mortis saluus ab infortunis, potens in suis dignitatibus, & si nullus planeta contrarius supra eum eleuatur, accidet mors propter infirmitates. Alia autem mors scilicet mala, accidit quando significator fuerit infortunatus, uel debilis, uel in alienis dignitatibus ei contrarijs, aut quando planetæ contrarij super eum eleuetur.

Y ij

Infortus